

Tužilaštvo - Tužiteljstvo Bosne i Hercegovine
Тужилаштво Босне и Херцеговине

Broj: T20 0 KTRZ 0019271 20

Sarajevo, 16.12.2021. godine

Na osnovu odredbi člana 35. stav 2. tačka i), člana 226. stav 1. i člana 227. Zakona o krivičnom postupku Bosne i Hercegovine, podižem

OPTUŽNICU

Protiv:

Živanović Milenka, rođenog
1946. godine u općini Srebrenica, državljanina Republike
Srbije.

Zbog postojanja osnovane sumnje da je:

Od 06. jula do 01. novembra 1995. godine, za vrijeme široko rasprostranjenog i sistematskog napada usmjerenog protiv pripadnika bosnjačkog civilnog stanovništva zaštićenih zona UN-a Srebrenica i Žepa, u toku kojega napada su VRS i MUP RS izveli operaciju trajnog i prisilnog premještanja ukupnog bošnjačkog civilnog stanovništva iz tih zaštićenih zona, operaciju hvatanja, zarobljavanja i likvidaciju oko 8000 muškaraca svjestan toga napada i da njegove radnje i postupci čine dio toga napada djelujući individualno i u dogovoru sa drugim učesnicima Udruženog zločinačkog poduhvata (UZP-a) među kojima su bili

koji su imali namjeru i zajednički cilj da djelimično istrijebe grupu bošnjačkog naroda enklave Srebrenica prisilnim uklanjanjem bošnjačkog civilnog stanovništva i pogubljenjima po kratkom postupku oko 8000 muškaraca i mladića Bošnjaka, Živanović Milenko na dužnosti komadanta Drinskog korpusa dao značajan doprinos ostvarenju toga zajedničkog cilja tako što je planirao, poticao, naređivao i učestvovao u prisilnom uklanjanju oko 40.000 žena, djece i staraca iz zaštićene zone UN

Srebrenica i Bošnjaka i hvatanju, zarobljavanju i protivzakonitom zatvaranju više hiljada muškaraca Bošnjaka bez utvrđivanja njihovog vojnog, odnosno civilnog statusa, prije nego što će biti pogubljeni, koji su u strahu za svoje živote pokušavali pobjeći pred napadom, tako što je: na dužnosti komandanta Drinskog korpusa vršio planiranje i rukovođenje aktivnostima svih potčinjenih jedinica u njegovoj zoni odgovornosti kao i praćenje njihovih aktivnosti kako bi osigurao da se njegova naređenja izvršavaju, samostalno i putem Štaba komande Drinskog korpusa [REDACTED] koji je bio zadužen da sprovodi i omogući što efikasnije sprovođenje naređenja potčinjenim brigadama, bataljonima pod njegovom komandom, pa je

1. u okviru planiranih i pripremnih radnji za izvršenje krivičnih djela koja su predmet ove optužnice u periodu od 08. marta do 13. jula 1995. godine izdao više naređenja jedinicama Drinskog korpusa da ograniče snabdijevanje bošnjačkog stanovništva Srebrenice i Žepe humanitarnom pomoći u vidu hrane, odjeće, obuće, lijekova i drugih vidova pomoći, da neselektivno granatiraju i gađaju snajperima civilne ciljeve u Srebrenici i Žepi da ograniče snabdijevanje UNPROFORA kako bi se eliminisala njegova uloga u zaštiti Zaštićenih zona i civilnog stanovništva neodobravanjem ulaska kamionskih konvoja sa humanitarnom i drugom pomoći u Zaštićene zone, u namjeri fizičkog iznurivanja stanovništva kako bi bez osnovnih uslova za život i bez zaštite njihov život postao nepodnošljiv što bi olakšalo njihovo protjerivanje iz Srebrenice i Žepe, dana 03. juna 1995. godine u namjeri da vojno onesposobi Holandski bataljon UN koji je imao zadatak da zaštiti civilno stanovništvo Srebrenice naredio napad jedinicama Drinskog korpusa koje su uz upotrebu sile preuzele posmatrački položaj Echo u Zelenom Jadru, dana 2. jula 1995. godine u skladu sa planom „Krivaja-95“ naredio granatiranje i napad na zaštićenu zonu Srebrenica u cilju njenog odvajanja od zaštićene zone Žepa i svodenje zaštićene zone Srebrenica na uže područje grada Srebrenice s ciljem da se bošnjačko stanovništvo prisili da se stijesni u sami grad gdje bi život postao nemoguć usljed nedostatka osnovnih uslova za život i tako primora bošnjačko stanovništvo da napusti Srebrenicu;

2. dana 06. jula 1995. godine u namjeri da izazove strah, pogibije i lakše protjerivanje civilnog stanovništva Srebrenice naredio ponovno granatiranje užeg gusto naseljenog područja Srebrenice, dana 08. jula 1995. godine zatražio od Glavnog štaba VRS-a da propagandnim informacijama za radio pozivaju bošnjačko stanovništvo Srebrenice da bezbjedno mogu napuštati Srebrenicu da bi dana 10. jula pod njegovom komandom i nadzorom pripadnici Drinskog korpusa izvršili artiljerijski napad na Srebrenicu u neposrednoj blizini bolnice gdje se okupilo oko 2000 civila kojom prilikom je ubijeno šest civila a napad se nastavio i trajao do 11. jula kada su snage jedinica Drinskog korpusa pucale iz vatrenog oružja na civilno bošnjačko stanovništvo dok se kretalo u bijegu prema Potočarima u pokušaju da spase svoje živote kao napad na položaje snaga UN-a s ciljem onesposobljavanja snaga UN-a za zaštitu civila tako da su snage UN-a bile vojno onesposobljene da štite civile u Srebrenici;

3. u periodu između 12. i 13. jula 1995. godine planirao, poticao, naredio i nadzirao prisilno premještanje civilnog bošnjačkog stanovništva iz zaštićene zone Srebrenica od strane pripadnika Drinskog korpusa i njemu prepočinjenih jedinica MUP-a RS-a pa je tako dana 12. jula rano ujutro naredio komandama potčinjenih jedinica da sve raspoložive autobuse i minibusu koji su vlasništvo jedinica VRS-a stave na raspolaganje komandi Drinskog korpusa tako da najkasnije do 16,30 sati istog dana dođu na stadion u Bratuncu i pridržavaju se uputstava za snabdjevanje gorivom i uputio naredbu Ministarstvu odbrane RS-a da izvrši mobilizaciju državnih i privatnih autobusa sve u svrhu prisilnog transporta bošnjačkog stanovništva iz Potočara dok su snage Drinskog korpusa i MUP-a RS-a pod njegovom komandom i nadzorom vršile nasilje, zastrašivanje, paljenje i razaranje domova kako bi prisilili civilno stanovništvo na napuštanje zaštićene zone Srebrenice, rano ujutro 12. jula 1995. godine zatražio odobrenje komande Glavnog štaba VRS-a za 10.000 litara dizel-goriva i 2000 litara benzina za kojim je vladala nestašica, za snabdjevanje autobusa koji su korišteni za prisilno premještanje civila

iz zaštićene zone Srebrenica kao i prisilnog transporta muškaraca koje su odvajali od njihovih porodica u Potočarima u svrhu privremenog zarobljavanja i ubijanja;

4. u periodu od 12. do 13. jula 1995. godine postupajući u skladu sa naređenjima [REDACTED] planirao poticao i naređivao odvajanje, muškaraca Bošnjaka u Potočarima od njihovih porodica i njihovo protivzakonito zatvaranje od strane pripadnika Drinskog korpusa i njemu prepočinjenih jedinica MUP-a RS-a a dana 12. jula nakon sastanka [REDACTED] u komandi Bratunačke brigade naredio jedinicama Bratunačke, Miličke i Zvorničke brigade da za metu oružanih napada uzmu čitavu kolonu muškaraca Bošnjaka u kojoj su pored pripadnika 28. divizije AR BiH većinu činili civili Bošnjaci u cilju sprečavanja njihovog prelaska na teritoriju pod kontrolom Armije R BiH pa su u tom napadu počev od 12. jula pa do večernjih sati 13. jula pod komandom Živanović Milenka pripadnici Drinskog korpusa i njemu prepočinjenih jedinica MUP-a RS-a zarobili više hiljada muškaraca Bošnjaka, na cesti Bratunac-Milići, prethodno im oduzeli njihove lične dokumente i dragocjenosti, držali ih bez hrane i vode a zatim prevezli u privremene zatočeničke objekte u Bratuncu, uključujući i muškarce odvojene od svojih porodica u Potočarima, gdje su ih zatvorili bez provjere njihovog civilnog, odnosno vojnog statusa protivno pravilima međunarodnog prava u škole, nogometno igralište, zgrade i vozila.

Dakle,

radnjama opisanim u ovoj optužnici kao učesnik Udruženog zločinačkog poduhvata u vrijeme širokog i sistematičnog napada usmjerenog na civilno stanovništvo, svjestan toga napada, planirao, poticao i naredio progon grupe bošnjačkog naroda prisilnim preseljenjem civilnog stanovništva na nacionalnoj, etničkoj, vjerskoj osnovi i zatvaranjem suprotno osnovnim pravilima međunarodnog prava,

Čime bi učinio krivično djelo Zločini protiv čovječnosti iz člana 172. st.(1) tačka h) u vezi sa tačkama d) i e) Krivičnog zakona BiH a sve u vezi sa članom 180. stav 1. i članom 29. istog Zakona.

TUŽITELJ

TUŽILAŠTVA BOSNE I HERCEGOVINE